

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí n̄inko chjasin Éfeso

¹ Janhan Pablo tsíkjeýána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko titekáonrá Cristo Jesús.

² Tjétjáncháha It'eni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixin nkaya nkajní kjuanjon ch'án.

⁴ Dios mé kjueya ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án.

⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhin ch'án.

⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án.

7 Imá tjuèhe Dios tí jeheni la xikaha kuaáxinni ijnié tí Xjeen ch'án k'úitji la xikaha tsjixín kaín ijieni.

8 Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuienxínni jína la ko kjuanjon ch'án kjuaxrexinkaon jína.

9 Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjinhin ch'án tsoxiteyá.

10 Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuenhen ch'án kaín xín nkehe siín nkaya nkajní la ko chjasintajni.

11 Dios kjueyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxí tóxrjinhin Dios.

12 Mé xikaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jíé chóna ch'án.

13 A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsíntáchro ch'án.

14 Tí Nchakuen Dios kujitonhenni mé kjuínchenoexínni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jíé chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuınhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios.

¹⁶ Ntá janhan nunca t̄t̄uaha nixjaha Dios tjánchaha kjuasáya kixin ó tinkachónkirá ch'án.

¹⁷ Tjénixjaha Dios, mé jehe ch'án mé ichr'án Ìnchéni Jesucristo, mé It'éni imá tjetoan la tjétjánchaha ch'án kixin tsotjáhará ch'án kjuaxrexinkaon jına kuènte Nchakuen ch'án kixin ntá antsí chrókuiénxinrá jına tí nkehe kuènte ch'án kixin ntá antsí má chróchoxínrá ch'án.

¹⁸ Kjaxin tjétjánchaha Dios kixin tsjinkitsa ch'án tsjanjon ch'án ijnko kjuaxrexinkaon jına kixin ntá tsonohará ts'ejochonhénra kixin xikaha kjueyará ch'án. La ko tsonohará kixin imá tjetoan tí nkehe sinchekitonhenni ch'án kixin jeheni mé tinkáchónkini ch'án.

¹⁹ La ko kjaxin tjétjánchaha Dios tsjinkitsará ch'án tsonohará kixin tí kjuachaxin kuènte ch'án mé ijnko nkehe imá jié noehyani nketí kjuèxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jié kjuakoxin ch'án

²⁰ tió kjuínchexechón ch'án Cristo. Ntá Cristo sákjui kjuák'etjaxin ch'án tja chjina tí It'é ch'án itjen nkaya nkajní.

²¹ Mé xikaha kjuanjon Dios kjuachaxin kixin Cristo ts'etuenhen ch'án kaín xín gobierno la ko kaín tí sín t'etoan. Ijie tjet'etuenhen ch'án kaín xín nkehe síin chjasintajni la ko chr'éxin ts'etoan ch'án kjaxin.

²² Cristo k'uáyéhe ch'án kjuachaxin ts'etuenhen kaín xín nkehe siín. Jehé ch'án mé ts'etuenhen kaín tí sín k'óna nínkoé ch'án.

²³ Tí nínko mé éxí tí cuerpo kuènte ch'án la jehó ch'án mé t'etuenhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxién Dios

¹ La ntá ijie Dios mé kjuínchekitonhanrá tí kjuachón jnkochrín kixin tinkachónkirá Cristo. Senó la jahará la éxí tsík'enrá kixin tí jínahya k'uékjich'erá la ko tí jie k'uékjasinrá.

² Mé xikaha k'uéchréhérá éxí sítónhen chjasintajni. K'uékjinchexiteyéhérá éxí tóxrjínhin tí nchakuen jínahya t'etuenhen tí xrínto la ko t'etuenhen kaín xín tí chojni titekakuenhya Dios.

³ Kaínni xikaha k'uék'ejóni tí ósé a naxa kjuínchexiteyéhéni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókjuich'eni la Dios imá chrókjuinчекjasóteni éxí tsjasóte tí í so sín.

⁴ A ntá Dios mé imá kuikonóehéni ch'án la ko imá tjuèhene ch'án.

⁵ La ntá kjuanjon ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án.

⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní.

7 Mé xíkaha kjuích'e ch'án kjuakoxin ch'án la naxa tjetjakoxin ch'án kixin tjuèheni ch'án la ko kjuínkĩtsani ch'án kixin tinkáchónkini Cristo Jesús.

8 Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahórá k'uitjará tíha. Náhí. Táha la mé kjuasáyé Dios kixin tjáhará ch'án.

9 Kixin jehya ichrén nkehe jína kjuích'eni kixin chrókjuinchehnkexínni.

10 Dios mé kjuích'éna tí jeheni ntá chr'éxin kjuínkĩtsa ch'án kixin tsinkáchónkini Cristo Jesús, kixin ntá chrókjuich'eni tí xra jína kixin xíkaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

11 Méxra jahará la jehya chojni judíorá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chóna xroye.

12 Xráxinkáonrá kixin tí senó la k'úechonhyará Cristo. Jahará la jehya kuènte tí nación Israel la xíkaha k'úechonhyará tí nkehe tsík'etqan Dios la ko tí nkehe tsíntáchro ch'án tsjanjon ch'án. Mé xíkaha k'uék'ejorá la k'úechonhyará Dios la k'úechoénhyará kixin chrókuaará.

13 La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uitji ijnié ch'án.

14 Jehé Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá

chrókjuenkayáxin sín kixin k'óna éxí jnkokoá chjasin. Cristo k'óxíka ch'án tí kjuanínkaon éxí ijnko tjat'o k'uinkákonhen.

¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéj kjuích'éna ch'án jnkokoá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin.

¹⁶ Mé xikaha k'uenyákonhenni ch'án k'uenxín ch'án tí ntacruz la kjuakjin ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxí jnkokoá cuerpo kuènte ch'án.

¹⁷ Cristo mé ikui la kjuakohe ch'án kaín chojni tí tan jina kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéj.

¹⁸ A ntá kjuachaxin kuènte Cristo la kaín ni kjónté jeheni o í so chojni mé tsochjineheni It'eni Dios kixin jnkokoá k'uáyéhēni Nchakuen ch'án.

¹⁹ A ntá jahará la í tóyóahyará chojni tsíkjixin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án.

²⁰ Jahará la mé tsík'ónará ijnko nchia tjat'o jié k'óna chrítaón tí xro k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etōan kuènte tí tjat'o a.

²¹ Tí xrankíxixín mé Cristo la chrítaón k'óna kuenté nchia la tinkák'ánki tí nchia kixin jina tsjak'e, ntá tsjixraká kixin ts'óna ijnko ninko tjóá kuènte Ìnchéni.

22 Mé xikaha jahará tinkachónkirá Cristo la tsojnkotsérá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

3

Ch'ín Pablo k'uáyéhe ch'án tí xra tsjakohé ch'án tí sín jehya judío tí tan jína

¹ Mé xikaha janhan Pablo mé tjéchinaxián tí tjákua itén Cristo Jesús kixin jína ts'ejorá kjónté jehya chojni judío tí jahará.

² Chrókónohará kixin kjuasáyé Dios kjuanjon ch'án tí xra k'uayáha kixin tsjákohará.

³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéhérá.

⁴ Tió sinchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya.

⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án.

⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxí ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sit'a kixin tsjakua tí itén ch'án kixin tí kjuachaxin kuènte ch'án.

⁸ Janhan mé kánhyó tjetooan kixin janhan la imá intsína la kaín tí í so sín tsíkjinchetjóá Dios la antsí tjetooan sín. Kjónté la Dios mé kjuínchekitonna tí xra imá tjetooan kixin tsotjanka tí sín jehya sín judío tí tan jina nkexrí imá tjetooan tí nkehe kuènte Cristo.

⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe.

¹⁰ Mé xikaha kónhen kixin ntá tí sín kuènte ninko tsjakuexin sín kaín xín tí sín t'etooan nkaya nkajní kixin tsonohe sín kixin xikaha kaín nkehe jina tsíkjenkayáxin Dios.

¹¹ Kaín tíha kjuích'e Dios éxí tsíkjenkayáxin ch'án ntá Ìnchéni Jesucristo la ó kjuínchexiteyá tíha.

¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án.

¹³ Méxra xrjanóahará kixin chrókujtoéhyará chrókuinkachónkirá ch'án kjónté tjétjasótena kixin kaín tíha kónhen kixin jahará chrók'uejoxinrá jina.

Cristo imá tjuèheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo.

¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni.

¹⁶ Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án

¹⁷ kixin Cristo chróchóna asánrá kixin tinkáchónkirá ch'án la ntá ntoá chrók'uejorá éxí ijnko nta tsíkji nuèe ninka la chrótjuèhérá kíchuará.

18 Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kǐnxín la ko nǐnkaxín la ko ntetoxín kǐxin nkexrí tjuèheni Cristo.

19 Tjánháha Dios kǐxin ǎntsí chrókónohará nkexrí imá tjuèhe ch'án tí jeheni mé ǎntsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkǐtsani ch'án la ǎntsí chrókuiénxínni tí kjuachaxin kuènte ch'án.

20 Ijie la chjéheni kjuasáya Dios kǐxin jehe ch'án chóna kjuachaxin tsjanjon ch'án ǎntsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkǐtsa tí jeheni.

21 Kjuasáyé Dios itjen jnkochrǐxín kǐxin Cristo Jesús kjuínchekaá ch'án tí nǐnko, mé xǐkaha ó xiteyá jnkochrǐxín. Amén.

4

Jína chrók'uejókoni kǐchó ni kǐxin chóntani Nchakuen Dios

1 Janhan mé tjéchjinaxián tí xra kuènte Ìnchéni. Méxra xrjanóahará kǐxin jína chrók'uejorá kǐxin xǐkaha Dios tsíkjeýá tí jahará.

2 Méxra chrókjuínchehnkehyará la ko chrókójiahyará la ko chrókójínará chrókóninkákonhyará la ko chrótjuèhérá kǐchuará.

3 Méxra jína chrók'uejokoará kǐchuará kǐxin chrókjuinkǐtsa Nchakuen Dios kjuaxróxin chrók'uejorá la ko jnkokoá chrókjuenkayáxinrá.

4 Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kǐxin jnkokoá nkehe ts'ejóchónhenni.

5 Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni.

6 Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

7 Jnkojnkonni k'uáyéheni kjuachaxin sich'eheni Dios xra kixin xikaha kjuanjon Cristo.

8 Méxra xikaha nixja xroon itén Dios kixin: “Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”*

9 ¿Ntá nkexrí t'axrjexín kixin sákjuí ch'án? Tíhi mé t'axrjexín kixin jehe ch'án mé senó k'uínkajinxin ch'án nkaya nkajní la kjuák'e ch'án chjasintajni.

10 Jehe ch'án mé k'uínkajinxin ntiha mé ntá jie sáxíkji ch'án tí nkajní imá noi. La ntá tjet'etuenhen ch'án kaín xín nkehe.

11 Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án.

12 Mé xikaha tí xra k'uáyéhe tí sín kjueyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo.

13 Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jina kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo.

* 4:8 Salmo 68.18

14 Méxra chrók'ónahyani éxí xjan ntsíntsí. Tí xjan-ntsí la xrahya tsjinkí kjuaxrexinkaon éxí ijnko nkehe sákjuiko xrínto xíkaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntia ntoáhya kixin chrok'uitjáyhenni Cristo ntá chrókjuasinni jie.

15 A ntá íchá jína chrónixjani tí nkehe chaxín ntoá la kaín asénni chrótjuèheni kichó ni ntá xíkaha chrókónoheni kixin xíkaha tjinkaon Cristo. Jehé ch'án mé tí kja t'etuèhen tí cuerpo kuènte ch'án.

16 A ntá kjuachaxién Cristo kuenté tí cuerpo, tí ch'e xra jnkokón la tjinkitsa kuenté. Ntá jnkoinjnkoni jína ch'eni xra la mé xíkaha ts'ánkí tí xra kuènte ch'án la mé jína chrótjuèheni kichó ni.

Tí kjuachaxin nixin kuènte Cristo

17 Tíhi mé ntáxrjan la ko tétuanhanrá kjuachaxién ihñié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha.

18 Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios.

19 Ó tsíkjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjínhin sín chrókjuich'e sín kaín nkehe jínahya.

20 A ntá jahará xíkahya xrakohará tí nkehe kjuako Cristo,

21 tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án.

22 Méxra t̄itohérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya náxa t'ayahará.

23 Jahará t'ichjánxin ḱixin chrókónixin tí kjuaxrexinkaon kuéntará la ko tí nchakuanrá.

24 Méxra chrókuákjára tí kjuaxrexinkaon nixin kjuích'éna Dios xíkaha tjinkaon ch'án la ntá chrókjuákoxinrá ijnko ntia jína ntoá.

25 Méxra chrókuītohérá tí kjuach'ia. Méxra jnko-jnkorá chrónixjehérá ḱichuára ntoá ḱixin kaín ni tsík'ónani jnkokoá cuerpo.

26 Tí chrókóninkáonrá la chrókjuásinhyará j̄ie la chrókóninkákonhyará kuenté yaon.

27 Chrókuītóéhyará ḱixin Tsochren chrókjuīt'ayahará.

28 Tí jnkojínrá kueerá la t̄itohérá kjuachee. Íchá jína ḱixin itjára chrókjuích'exínrá xra ḱixin tsochon-tará chichaon sinchek̄itonhénrá jnkojín nkexro t'ichjánxinhin.

29 Nixjahyará tí nkehe náxrxónhya. Nixjará ijnko tan jína ḱixin tsjink̄itsará ts'ánkí kjuaxrexinkaon kuènte ḱichuára la xíkaha tsjink̄itsará tí sín tjejótinhin.

30 Nchek'ávahyará tí Nchakuen Dios ḱixin tíha mé k'uayéxinrá éxí ijnko xroye ḱixin tsonoaxínrá ḱixin jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaára.

31 T̄itohérá tí kjuanínkaon chontará la ko t̄itohérá tí nkehe ntoáhya t̄jenkayáxinrá la ko t̄itohérá tí kjuanoṭon la ko kaín nkehe jínahya.

³² A ntá chrókójínará chrókujkonóehérá kíchuará. Sinchek'itjáyenhenrá ijíé kíchuará kixin Dios kjuatsen tí jie chontará kixin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxí kjuakoxin tí jehe ch'án.

² Chrótjuèhérá kíchuará éxí Cristo tjuèhe tí jeheni kixin jehe ch'án la k'uenyákonhenni ch'án, éxí yóhe ijnko kolélo xikaha kjokehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará.

⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya.

⁵ Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchónka sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etoan Cristo la ko Dios.

⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuènte Dios la tsjasóte tí sín titekakuenhya sín tí jehe ch'án.

7 Méxra chrók'uítóhyará tí sín xíkaha ch'e.

8 Senó la k'uék'ájirá ntia sítié. A ntá ijie ó k'ónará chojni kuènte Ìnchéni la ó xritjejórá tí ntia t'inkaséyan kuènte ch'án. Méxra tjenkayáxinrá jína éxí tí sín xritjejó tí ntia t'inkaséyan.

9 Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá.

10 Tóxakonhanrá chrókjuich'erá tí nkehe tóxrjínhìn Ìnchéni.

11 Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan.

12 Chrókósuèhèni chrónixjani kuènte tí nkehe imó ch'e tí sín jínahya.

13 Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe.

14 Mé xíkaha ntáchro xikihi:

T'àya jaha tjéchrian t'inkatjenxian tí siín tí sín tsík'en.

Cristo mé tjetjoka xrohi.

15 Méxra imá chrókóxakonhanrá jnkojína chrók'uejórá. Jehya éxí tí sín noehya chrók'uejórá. Náhí. Chrók'uejórá éxí ijnko chojni nohe má.

16 Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra.

17 Chrókólontihyará. Chrókóxakonhanrá chrókuiénxinrá tí nkehe tóxrjínhìn Ìnchéni.

18 Chrókókoanhya kixin tíha mé chrók'uitjáyanxínrá. Íchá jína chrókjuánjonrá kjuachaxin chrók'uetuānhanrá Nchakuen Díos.

19 Chrónixjexínrá kichuára tí salmo la ko tí himno la ko chrótsjerá la xikaha kaín asánrá chrókjuancheherá kjuasáyé Ìnchéni.

20 Jnkochrín chjehérá kjuasáya It'éni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Ìnchéni Jesucristo.

Jína chrók'uejókoni tí sín kjéhyani kixin tinkáchónkini Ìnchéni

21 Títekákonhénrá kichuára kixin ó tinkachónkirá Ìnchéni.

22 Tí chojni chjin chrókjuinchexiteyéhe xìi sín éxí nchexiteyéhe sín Ìnchéni.

23 Tí chojni ntoa chóna kjuachaxin ts'etuñhen ichjién éxí Cristo mé ikja t'etuñhen tí nínko. Kjaxin jehe ch'án kjuíncheakaá ch'án tí nínko, mé tí cuérpóé ch'án.

24 Méxra éxí tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xìi.

25 Tí chojni ntoa chrótjuèhe tí ichjién kixin éxí Cristo la tjuèhe tí nínko la k'uenyákonhen ch'án.

26 Mé xikaha kjuích'e Cristo kixin sinchetjóá ch'án tí nínko mé kjuínchetjuáxin ch'án tí nta kuíkitexín sín kjuachaxién itén ch'án.

27 Ntá tsjanjon ch'án tí jeheni éxí ijnko nínko imá jína chóntahya jje la ko chóntahya ninkehó nkehe náxrjónhya, mé ijnko nínko tjóá la ko ntoá.

28 Mé xikaha tí chojni ntoa chrótjuèhe tí ichjién sín éxí tjuèxín ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án.

29 Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpóé sín la mé xikaha Cristo t'ayakonhen tí nínko.

30 Kaínni mé k'ónani cuerpo kuènte ch'án. Jeheni mé ntoe ch'án la ko huésóé ch'án.

31 Ntáchro kixin: “Méxra ijnko chojni ntoa mé tsítóhe it'é la ko ìné kixin tsakja ichjién la yóí sín mé ts'óna éxí jnkokoá chojni.”*

32 Tíhi mé ijnko nkehe imá jié tienxínhya ninkexró. Mé janhan xrjanka kuènte Cristo la tíha mé nínkoé ch'án.

33 Méxra kjaxin tjéxrjanka kixin chojni ntoa t'ichjánxin tsotjuèhe ichjién sín éxí tjuèxín asén sín la tí chojni chjin chróchóntehe sín kjuasáya tí xìi sín.

6

1 Jahará chánjanrá la t'ichjánxin sijnchexiteyéhérá it'ará la ko ìnará kixin tjuèherá Ìnchéni kixin tí xikaha mé jína.

2 Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuikosáyehérá it'ará la ko ìnará

3 kixin mé náxrjón chrók'uejorá la isé chrók'uejorá ntihi chjasintajni.”*

4 Jahará it'é xjan la chrókjuinchekónínkakonhyará tí xjaanrá. Íchá jína kixin sijnchek'ánkixinrá xjaanrá ijnko kjuaxrexinkaon jína kixin ts'ánkixin xjan tsinkáchónki xjan Ìnchéni.

5 Jahará chojni ch'e xra mé chrókuitekákonhénrá tí lámóará ntihi chjasintajni la chróchontehérá sín

* 5:31 Génesis 2.24 * 6:3 Éxodo 20.12; Deuteronomio 5.16

kjuasáya. S_ich'eherá sín xra éxí ch'eherá xra Ìnchéni Cristo.

⁶ Chrókjuich'erá xra jína la jehya kíxin tí tjejó sín tjejótsjehe sín kíxin ntá xikahó ntá jína chrók'uejoxinrá. Náhi. Éxí ch'eherá xra Cristo kaín asánrá s_ich'erá xra kíxin mé xikaha tóxrjính_in Dios.

⁷ Kaín asánrá chrókjuich'erá xra éxí ch'eherá xra Ìnchéni la jehya éxí chojni ó chrókjuich'eherá xra.

⁸ Ó nohará kíxin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kíxin nkexrí tí xra jína kjuích'e sín.

⁹ Tí jahará chojni lamó mé jnkójina chrókuétuēnhénrá tí sín t'ahará xra la séchrókóninkákonhénrá sín. Xráxinkáonrá kíxin jahará la ko jehe sín mé jnkokón chrókjuinchexiteyéhérá Ìnchéni itjen nkaya nkajní kíxin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A ntá jie kíchó ni, nchefuérte asánrá kíxin tjejókoni Ìnchéni la tje_toan tí kjuachaxin kuènte ch'án.

¹¹ Chrókuaáxinrá kaín tí kjuachaxin tsjanjon Dios kíxin ntá xikaha jína chrók'uejorá la chrókjuít'ayahyará Tsochren.

¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya síin chjasintajni. Tíha mé tjinkaon chrók'ue_toan tí chjasintajni sítié.

13 Méxra chrókuákjárá kaín tí kjuachaxin kjuanjon Dios kixin ntá chrókjuachará tí itsi tí yaon jínahya ntá tí xikaha chrókjuich'erá la chr'éxin la jína chrók'uejorá.

14 Nchefeúerte asánrá. Jína chrók'uejorá. Chrókuítekáonrá tí itan chaxín kixin tí nkehe ntoá mé chrók'uayakonhanrá.

15 Méxra listo chrók'uejorá sátsjichronkará tí tan tjanjon kjuaxróxin.

16 La antsí tjetoan chrókuinkachónkirá Inchéni. Tíha mé chrok'uinkákonhen tí chica flecha tsochr'án Tsochren.

17 Tí chrókuaáxinrá la táha éxí yóhe ijnko chica casco t'ayakonhen ikja chojni la tí itén Dios la éxí yóhe ijnko chica espada mé tjanjon Nchakuen Dios.

18 La ko kjaxin chrókuitoéhyará chrónixjehérá Dios la jnkochrínin chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkitsa Dios kaín tí sín tinkáchónki ch'án.

19 Chrónóehérá ch'án kixin kjaxin janhan tsjinkitsana ch'án tsjanjon ch'án tí tan t'ichjánxin tsoníxja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni.

20 Dios mé ichr'ánna tsoxrjanka tí itén ch'án, mé xikaha tjéchjinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjet'a.

²² Mé xikaha tétu^uanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

²³ Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án.

²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b